

# Platbook 2. Ieësteling

**Har Sniekers**

## **bron**

Har Sniekers, *Platbook 2. Ieësteling*. Uitgeverij TIC, Maastricht 2009

Zie voor verantwoording: [http://www.dbnl.org/tekst/snie003plat01\\_01/colofon.php](http://www.dbnl.org/tekst/snie003plat01_01/colofon.php)

© 2013 dbnl / Har Sniekers



## Ieëstelinge

Mien vader poeatdje inj mieërt altied ieëstelinge. Ich móch den es jungske de pueters vuuerzichtig in 't kuulke lègke. Ein paar maondj later deje wae de aerpel al oet. Jóng, det waas kirmes aan de taofel - die ieëste vreug aerpel. In häör dun vees velke kós se die zoea koeake of bakke. En den 't leefs mèt ein kluntje gooj bótter.

Gae moogtj hie ouch preuve van ieëstelinge. Door Limburgse sjrievers in eigeste gaard opgetrokke gedichte en hie in de serie Platbook deil 2 vees vuuer uch opgedeendj. Van de meiste hób ich noeats gehuurdj, van inkel angere waal en al ins get gelaeze. Mer allemaol nog neet gepubliceerdj. Daoróm ouch deze bundel van 't Huis voor de Kunsten Limburg, det häör gevraagdj haet eige werk in te sjikke en d'r mèt nao boete te kómme.

De oetgaever vroeg mich nao eige smaak ein keus te make. Det hób ich gaer gedaon. En gae wètj: ueever smaak vèltj bès te kalle. Det doon ich den ouch. Laot mich ieërliek zeen: ich bèn blie det zoeaväöl sjrievers - jónk en aod - van zich hóbbe laote huure. Ein fieës óm häöre ougs al in mieërt oet te kènne doon en vuuerzichtig bie-ein te rape. Ich mós d'r bie lache, gniffele, naodinke en soms ouch riehere. Opvallendj vööl sjrievers vertèlle ueever de leefdje tösse aojer en kindj in gewuuen versjes - waal dèk aangriependj. Wiewaal de kiek op eige dörp of anger stad zich nog altied nostalgisch aandeentj, weurtj d'r ouch gekeke door gepoetsdje brilleglazer. En gelökkig zeen d'r zat dichters die mich laote bènnekieke in 't deeps van häör eige zeukendje zeel. Det gaajtj mich nog 't meis...

Kóm; sjuuftj aan aan de riekgevöldje taofel van oos Limburgs plat en laotj uch dees opgesjöpde ieësteling good smake.

*Har Sniekers, mieërt 2009, Toear*

*Annelies Holtman, Tegele*  
**Hertepien**

Soms wit ich mam ens get vertèlle  
Maar smeis ontbrik mich den de mood  
Zal ze 't waal begriepe,  
Of doon ich 't waal good  
Ich waas vandaag besjlis neet leef  
En abseluut neet eure hertendeef  
Wat waas ich kwaod  
Naeve 't brutale aaf  
Det mam det sjanp is supergaaf  
Ze wilt gen blome um sorry te zègke  
Lever haet ze, det ich 't zelf oet kom lègke  
Den rolt ein träönke euver mien wang  
En mam zaet: Kink, bön maar neet bang  
Sjtraks as dow zelf mam zals zien  
Begriepts se pas mien hertepien.

***Annelies Holtman, Tegele*****Poëziesjriever**

Met trillende kneen en bevende heng  
Van de zenuwe klappere zelfs mien teng  
Sjtaon ich dit gedich veur te drage  
Wat sjpeciaal gesjreve is veur blage  
Ich vraog mich waal ens aaf wie die minse det verzinne  
Zelf zou ich neet weite wao ich meus beginne  
Maar jidders kier sjtaon ich d'r van vesjteld  
Wie zo'n versje in 't dialek wuurt gesjpeld  
Ich probeer mich good te concentrere  
Want oeëit wil ich det zelf ens gaon probere  
Ein opsjtel sjriever in 't ABN  
Det is get wat ich bes waal ken  
Maar in 't Tegels geit 't ech verkierd  
Det hebbe ze mich ouch noeëits gelierd  
Mesjien is 't waal zoeë as ze zègke  
Des se dich dao op mos toe gaon lègke  
Van now aaf aan gaon ich det doon  
Want 't meiste liers ze in dien kingersjoon  
Den wuurt heej euver ein jaor of tig  
Ein gedich veurgedrage wat gesjreve is door mich

***Audrey Laven, Kirchroa*****Alfahulp**

## 81 Alling

Sjtreuft 't smörjens langs jen sjtroas mit d'r rollator en riest de drekzek óp. Vier dekke tsezame d'r dusj, mit kapot tservies dat nog vies is va boese. Iech sjtub d'r sjrank aaf.

Iech kriesj um hön zieël. Die nog wil, evvel nit mieë kan.

## 86 Attak

Pist in bóks en lieët ziene kauwjoemie uvveral oes d'r mónk valle. Vier drinke tsezame kaffe, de kauwjoemies plekke va binne an de tasse. Iech waesj de óngerbókse oes.

Iech kriesj um hön zieël. Die nog wil, evvel nit mieë kan.

## 91 Verkiensjt

Hat nuung kinger en sjnoeft ziech an de heng went ze ziech tusje de bee kratst. Vier kieke tsezame foto's, noa de medalje van d'r Führer vuur jouw moddere. Iech poets 't kóffer óp.

Iech kriesj um mieng zieël. Die miech nit zal besjutse.

***Els Heijdendael-Jongmans, Valkeberg***  
**Druim**

Ich laot dich noeëts - nee noeëts alling  
zag hae, wie 't in zien ouge keek.  
En gans confuus van zoevääol leefde  
deeg 't zien hart aoep en beefde.

De honing goof hae uëervloedig  
pas bie 't lètste sjprengske leech,  
loot hae zich drieve op z'n vleugels,  
sjteeg op en ging allein op weeg,  
veurbie de sjterre en de maon  
en loot Miepmpöjje einzaam sjtaon.

***Els Heijndael-Jongmans, Valkeberg***  
**Kingerleedsje**

Wit sjeupke, sjuart sjeupke, mörge ies 't heil.

Es wit sjaop kins te dich van alles permitere.  
 Of dat ech waar is, zal de tied dich waal liere.  
 Of-s te milk maaks, 'n lemke, of inne zak werm wol  
 Krieg 't in Gods naam neet te hoeëg in diene bol.

Want duis te es wit sjaop ederein aan 'n zie  
 Of geis te op 'n ander meneer 'n sjaop aan de prie  
 Geis te oet hoeëvaart naeve dien eige hoeve sjtaon  
 Dan ies 't in de kudde mit de vreë gauw gedaon.

Want es te es zjwaak sjaop in de maatsjappie gebaore bis  
 Dan ies d'r veur dich es sjaop 'ne ganse boel mis  
 Dan traent ederein dich zoeë mer effekes op dien hart  
 En iers te 't wits bis te es wit sjaop dan sjuart.

Dat sjuart dat geit noeëts mieë gans van dich aaf  
 Al weursj te hónderd jaor en laefs te gans braaf.  
 Al drieëns te dich 't binnenste boete of sjteis te op diene kop  
 Dat sjuart op dien lief, blief ummer d'r op.

En diegene, die dich zoa sjuart oeëts kleurde  
 Die laeve hun laeve of d'r gaar nieks gebeurde.  
 Doe kries ze mit 't verve toch noeëts gesjtop  
 Want ze hóbbe allein mer sjtruë in de kop.

Wit sjeupke, sjuart sjeupke, mörge ies 't heil.



***Guus Peters, Gelaen***  
**Drie gedichte naor Jiménez**

*(Juan Ramón Jiménez 1881-1958)*

**Kleine zank veur ei jónk maedje**

De aerd, greun en in bloom,  
 Van de nuje kirkef

Haet dich dizze mörge  
 In häör veesj hart gebóрге.

In 't oetgaon zoog ich  
 Eine zónnekrans, de haore  
 Van dich, worin-s te góngs,  
 Ein hoagleed van vuur,  
 Op nao de klaoren heëmel  
 Wagewied aope...

Gevalle veurjaor,  
 Leefde taer geknot,  
 Nieks zoogs te devan  
 Euver wat-s te 't haws mit ei lechske!

Ein reis maakdes te mer,  
 Van de aerd nao d'n heëmel.

## Sjoanen doad

Wie wils te mich pien doon, doad?  
 Deit 't laeve dan gein pien! Wie  
 Dan hōb ich meë mood van doon  
 Veur 't laeve baove de aerd es  
 Veur daen depen doad d'r ónger?

De aerd is die angesj es de lóch?  
 Wiezoa zów die ós doon sjtikke,  
 Wiezoa zów die os blènje,  
 Wiezoa ós platpeesje,  
 Ós sjlete de móndj?

Woróm mót sjterve dat zeen  
 Wo v'r sjterve taenge zègke,  
 En laeve allein maer 't laeve  
 Zónger dat wo taenge neet?

Woróm moog d'n echten doad  
 (wat v'r neet zoa wille neume)  
 Neet veur ós zeut zeen en zach  
 Wie ouch 't echte laeve (of dat  
 Wat v'r dan zoa heite te zeen)?

## Lètste reis

...En ich zal gaon. En blieve zulle de veugelkes  
Mit hunne zank.  
En blieve zal mienen haof mit ziene greune boum,  
En mit ziene witte waterpöt.

Al aoves zal d'n heëmel vrejig blauw zich sjpanne,  
Prónt wie dizze naomiddeg, baoven 't sjeel van  
De klökskes in d'n taore.  
Sjterve gaon al die mich höbbe leefgehad,  
En 't dörp zal mit 't jaor zich vernuje.  
En in 't besjlaoten heukske van mienen haof,  
Witgekelk en al bloom  
Zal verwaeze naodruime miene geis van noe...

En ich zal gaon, angesj zeen, zónger haerd, zónger dae greune  
Boum, dae witte waterpöt,  
Zónger dae vrejig blauwen heëmel...  
Mer de veugelkes zulle blieve mit hunne zank.

***Hub Fober, Voelder***  
**Winthage**

De bis mer e sjiemke op dees welt  
E pluske durch d'r wind verloare,  
Neet extra vuur dees eerd besjteld,  
Meh langsam oet d'r tied geboare.

Dien huuskes hange krómp durchee  
De mieëste zoeëget ram versjlieëte  
Es woare ze doa sjtuk vuur sjtuk  
Es aafvalgood mer neergesjmieëte.

Toch lieks doe doa neet oane grónd,  
Zoeë sjuuns en sjeef gemeëte  
Verloare in 't landsjap rónnd  
Es woar me dich vergeëte.

Dich bis vuur ós öm noa te kieke  
Want durch dich pas weëd ós kloar,  
Wie flot de daag versjtrieke,  
Wie sjoeën ós welt ins woar.

***Hub Fober, Voelder***  
**D'r merel**

Gans sjiekem, gebukt,  
 Hat heë vruchte geplukt,  
 Heë leep langs de rendjes  
 Van mien aardbeieplentjes,  
 Heë sjloekde en pikde,  
 Vloog op en versjrikde  
 Zich kier op kier  
 En ging ummer wier.

Ich zoog al die oere  
 Zien kralskes loere,  
 Heë reep op zie leef  
 Deë koalsjwarte deef,  
 Doe sjloekde ze same  
 Ich moos ze vermane  
 't Woar neet te verdrage  
 Ich ging ze verjage.

Wie sjieëmerleech veel  
 En róngang ich heel,  
 Zoot heë op d'r droad  
 Bie mich vuur g'n sjtroat  
 In jubelend uite  
 Zien toeëne te sjpuite,  
 Gedrage en wied,  
 Doe houw ich wir sjpiet.

Ziene parelende klank  
Woar wie oprechte dank  
En zien klaterende toeëne  
Wie blinkende kroëene  
Op gans de natuur  
Vol prachtige kluur,  
En ich hōb geloesterd  
Durch klanke gekloesterd.

Blief woeëne bie mich  
En ich geëf aan dich  
Elke plant, alle vruchte  
't Is vruje in zuchte,  
meh ich hōb d'r nog reef  
vuur dich en die leef  
En vleege noe neet wier,  
meh zing nog 'n kier.

**Jan Feijen, Wieërt**  
**Vallendje blaar**

As de blaar valle  
 huuërtje in ziene kop  
 di-j stumme weer kalle  
 Hae kân d'r neet tieëgenop

Tot zien groeët verdreet  
 mótte doon waat ze zègke  
 Gaer of neet  
 Hae hieët t'r zich mer beej nieër te lègke

Hae mót gaon en staon  
 woeë di-j stummen 'm dwînge  
 En 't kosj 'm mennige traon  
 um zien röst weer te vînge

Waat e deût wètje neet altiêd  
 As ze-n 'm zègke waat e dieëj  
 kriegtje dèk hieël vól spiêt  
 Det waal, mer 't geuftj 'm nog gein vrieëj

Hae mót t'r mej lieëre laeve  
 Det e van tiêd tot tiêd  
 Neet in 't pôtje pisj mer d'rnaeve  
 D'rnao hieët e altiêd spiêt, spiêt, spiêt!

Woeë-t e ouch gieët of stieët  
 hae kiektj altiêd um zich haer  
 mer wètj dan toch neet wi-jte 't hieët  
 Waasj mer ânger waer!

Zoeëlang de blaar bliêve valle  
Stumme in ziene kop  
Ze bliêve mer kalle  
Hultj det noow noeët 's op?



***John Bovendeert, Heële  
loester***

loester 't echoot nog  
loester 't echoot óp d'r zulder  
in miene kóp  
in depe gengsjkes  
van mieng oere zingt 't nog  
van alderlei igelieste wöad  
en 't flónkert zoeë va klanke  
en ich weet neet va wiewöal gedanke

't kiedelt mich  
langs miene ruksjtrank aaf  
en roetsj mich sjtillekes  
durch alle oare  
toefelt dan es letste  
mie hat noa binne  
ich bin mich zieëker...  
doa blieft 't nog 'ne gans tied

***John Bovendeert, Heële  
oavendgebed***

dat ich sjoele maag  
neëve dich  
en sjloape  
bis d'r nuie daag  
dat deet mich sjoevere in d'r lach

egaal of vregelig  
of dreuvig durch d'r wien  
neëve dich ving ich michzelf  
umdat ich ummer zieëker weet  
dat-s doe óch wits

sjtil  
zach  
i gen duuster

beloester ich diene oam  
befluuster ich dien lippe

***John Vandenberg, Kirchroa*****Wat hat deë man, wat iech nit han?**

De vrauw Bulemans dreët de bule  
Nit alling mar in de hank  
Óch ónger heur jroeëse oge  
Hange zie ónrejeerd jans lank

Zoeë zitst zie in de buut en dinkt  
Zoeë jeet 't in de welt  
D'r inne hat d'r buul  
D'r angere hat 't jeld

Mar inne buul jef iech tse roane  
Hat de vrauw Bulemans zeker nit  
Zie hat ziech dan óch nit jetroane  
Óp woa mennieje keël dróp zitst

***Lej Doam, Sjilvend***  
**Klatsjwiever**

‘Daag Zeef! Lang neet mieë gezieë,  
 bès te dèks weer krank gewae?’  
 ‘Nee Tring! Dat vier ós lang neet zoge  
 haet 'n gans anger rae!  
 Mer hie in de winkel kan ich nieks vertèlle,  
 ómdat me dat da huurt  
 Wach boete effe, da vertèl ich dich dan waal,  
 wat mich is gebuurd!’

Doe kèns toch dat nöt vrech lódder,  
 drie dure wiejer va mich aaf!  
 Dat haet mich ee paar waeke geleie  
 mèt 'ne bessem op de kop gepaaf!  
 ‘Höbs te dich dan neet gewaerd,  
 lieës doe dich dat van dem gevalle?  
 Keem dat da van alleen,  
 of woasj te weer uëver heur aan 't kalle?’

‘Dat keem doer dae nuje vrundj van heur,  
 dae mèt de ganse kale kop!  
 Ich zag alleen mer taenge heur:  
 Gelökkig höbs doe waal nog hoare drop!  
 Wie 'ne furie keem 't op mich aaf en reep:  
 Doe aafguëstige draak!  
 En haet mich effe later  
 vól mèt de bessem boave op de kop geraak!’

Wie ze mich noa bènne droge,  
doe hoert ich dat lódder kwake:  
Wens te nog èns de moel op dees,  
zal ich dich nog veuël helder rake!  
Ooch die, die naeve mich woeëne,  
die mèt dae ganse sjtal vól poete!  
Sjtónge, es went d'r duivel d'r mèt sjpilt,  
ooch nog allemoale boete!

Die makde flot dat ze noa bènne keme  
en bie hun heem op 't oape good.  
Went ich good gehoerd hōb,  
zag 'ne va heur poete: Zelf sjood!  
Went die neet uëver angere ka zevere  
of hun ka doersjtreupe en bekalle!  
Mot ze ieësj mieë noa zich zelf kieke  
en neet ummer uëver angere kalle!'

***Leonne Cramers, Gelaen*****De póts**

't Vreugjaor is dao  
 de póts is aangezag  
 mit pótslómme, tob en sjotelsplak  
 begint me op zölder  
 al wurt vasgepak  
 gesjrob, gesjoerd, gesjtob  
 en in de was gezat  
 in 't gans hoes de vinster aop  
 om de wëntjer d'roet te laote

Póppekas,  
 mit de potlaepel maedjes ingegaeve  
 póntefekaal praedigt,  
 prakkezeert de prie  
 wie ze van de prèngel  
 'ne praopere präötsj pratsj  
 dae zörgsaam maort en póts

Noe bèn ich zoa wied dat ich ummer  
 mien gooj veurnummes  
 good aafbeusjtjel  
 en sangerendaags  
 zónger  
 leuëter  
 aetje, soda en greun zeip  
 dae pótsfiemel  
 óm zeip help

***Leonne Cramers, Gelaen***  
**Jederein neumde häöm ‘Elvis’**

Vreuger waor 't 'ne nozem  
dae wilje sjtroef mit vèt  
sjnotnaas, wiesnaas, rebelsj pertrèt  
't ganse dörp kènde häöm

Nuusjeërig in de sjpegel gekeke  
dach t'r waat is toch los?  
zien haor verlus de vos  
mer neet zien eige sjtreke

Van dae wilje neet te benjige sjtroef  
is nog mer e fitselke euver  
'n paar pemele gries wie 'n doef

Leef sjtriek zie zeumerend al jaore d'reuver  
ruzelend wurt dae sjeigel sjtilkes 'n groef  
brökkelt ‘Elvis’ en ziene waesje sjtroef

***Luc de Rooy, Stein***  
**Breeffragmente**

**I.**

Op de helling net boete mien raam  
 Sjtrómpelt ein wit paerd nao baove.  
 Häör flanke aojeme.  
 Ze versjtilt  
 Es 't kaord rón dj 't rechterachterbein d'r tröksjruk.

De höbs geliek, goje vrundj,  
 Ich vertèl dich neet alles:

Häör nate veutsjtep loupe nog op miene tegelvloer  
 Achter mich,  
 Wo ze niks taeye mich zag.  
 Niks mjè zaet.

En ich, ich kiek nao boete  
 Nao dat witte paerd  
 Dat klump. Dat sjtrompelt. En sjruk.



**II.**

Get wiejerop traent eine ziene vechhaan.  
Hae hilt 'm ein handj baove de kamp  
En truk dae trök es 'r aanvilt  
Tot ze allebei meug beginne te waere

Es ze neet mjè reagere, zag 'r mich 's,  
Kènne ze 't bèste aafgemaak waere.

**III.**

Dao vilt de deur achter mich toe,  
Terwiel ich nao boete blief sjtare.

Ze löp mich wo de buim neet sjtaon  
Veurbie  
En es ich opkiek zjwèjje de bananeblaar mit de wèndj mit.

Nei, ouch dat neet.

***Marcel Abrahams, Venlo***  
**Altied leech**

As ik kom,  
Is d'r leech  
As ik gaon  
Is d'r leech  
Niks is moeëjer  
As wakker waere in Mestreech  
As ik aankom  
In dees stad  
Umdet ik 't weer ens  
Met Venlo heb gehad  
Dompel ik mich onder  
In 't werme bad  
Van 't Mestreechter plat  
En dink ik nog ens truuk  
Aan 't maedje  
Det ik heej had  
In de stad  
Van non-stop leech  
Ik umerm  
De joie de vivre  
Van de stad  
Mestreech

***Mariet van Knippenberg, Kessel*****Dees roes is neet doed**

Dees roes is neet doed  
Al liekt ze van perkament  
Ze likt bie dien foto  
Neet allein veur 't sentiment  
Ik noom ze van dien graaf  
Op 'ne decembermorge  
En as ich 't te kwaod krieg  
Van heimwee, verlange en zorge  
Den sjtriect miene vinger  
Zachtjes naeve zo'n blaedje  
Den dink ich aan dich  
Dien kiendje, dien maedje  
Den weit ich des se bie mich bes  
Mien hiele verdere laeve  
Aan al die leefde die se goofs  
En altied weer zals gaeve

***Marion Coenen, Zitterd*****aom**

wie loewt de vraog  
wovan 't antjwoord  
sjnit  
dwaesj door  
sjrevend wit  
sjneewit laeve  
zich wiek  
nao deip duuster blauw  
aom  
razelt door de knäök  
eine zuch  
ewige roew vundj  
gein gedachte  
gein woord  
gein vraog  
gein sjtèlte  
gein duuster  
gein leich  
gein laeve  
geine aanvank  
gein enj  
gein antjwoord  
gein angs  
zuver vertroewe zeen  
euveral  
neit hie  
wo tied wied is  
ruumte

zonger vórm  
zonger vastigheid  
zonger beteikenis  
zonger bezej  
zonger waeze  
zonger mich

***Marion Coenen, Zitterd  
gank***

ich bèn eine gank  
tösje aanvang en ènj  
ich bèn eine gank  
van aanvank pès enj  
dènk ich  
in d'n aanvank  
geuf 't mich neit  
in 't enj geuf 't mich neit  
gaondentaere  
van niks nao nirge  
kèn ich zeen

***Math Scheeren, Zumpelveld*****Blömsje**

Die köpje jraad boave de eëd  
Tserbriechlieg in d'r wink  
Sjteest doe doa  
D'r winkter nog nit jans jedoa

Blömsje zoeë fie  
Brings werm kluur  
Noa kauw en duuster  
lech sijnak noa mieë

Blömsje, hod diech feste  
Mós wase, nit reste  
Bluie en ós trüeste  
Kling, engliesj.... ruesje



***Paul Poell, Remunj***  
**Klakke, klote**

In de steeg  
van 't aafsjied  
kleurde witte  
gevels zwart  
ein gebraoke leefde  
in ein traon gevange  
weg, 't giere  
van hormone  
altied de opmaat  
veur eine sjone nach  
't hijge, inein rijge  
kreune, 't is volbracht  
in de steeg van  
't aafsjied,  
klónk 't klikke  
van dien hakke  
es eine mitrailleur  
't geluid sjtorf weg,  
ich t'r plekke

***Paul Poell, Remunj***  
**Lief, leef**

Mien lief is diene piano  
dien vingers kinne keze  
tösse Mahler, Debussy  
mien verrökking zal  
ich heurloos etalere  
en 't sjoonste  
van mien zie!  
weg die partiture!  
v'r predulere d'r op los  
verzinne eders keer  
ein nuuj ouverture al  
veulend, sjtrelend,  
zjweitend, zjwevend  
bekans de hemel in  
kreunend van  
godszaligheid  
tegeliekertied  
ram van god los!

***Petra Kaiser, Kirchroa*****Res-je winkter**

Mai, Marie,  
 Miechel en Tsebiel  
 allewiel en allenäu.  
 D'r deeg jeet  
 d'r sjpeul sjteet  
 en weë d'r teppich klopt  
 dem danse de vlokke um de oere.  
 Allewiel.  
 Los legke, kink, los legke,  
 de mam die drieënt ziech oes d'r sjlof  
 d'r 3sat aa  
 en wermde drinkt ze oes ee tes-je  
 mit sjmaal oere  
 en rues-jer an d'r rank.

Mai, Emiel,  
 Marie, Antonia,  
 allenäu en allewiel.  
 Wits te dat de mam  
 't sjtuupje nit mieë kere deet?  
 En óch d'r noaber  
 hat jet angesj tse doeë,  
 is vroeë dat de poete oeser hoes zunt.  
 Allewiel.  
 D'r jaad wieëst tsouw  
 mit ónnut en plastic kroam  
 en dat wat ze nog nit vertsakkerd hant,  
 waad  
 bis alles werm óp heem aa kunt.

Mai, Maria,  
 Joezelef hulp,  
 allewiel en allerhand.  
 Wat dees te draa, mie leef?  
 't Wase van de ieëlend  
 jieëft jidderinne reët.  
 Los joa en los jeweëde.  
 Allewiel.

D'r jek kriet ziech ing sjup  
 en jrieëft en jrieëft  
 ee jans jroeës laoch  
 woa alles drin jewôrpe weëd  
 dat mit of oane weëd erum likt.  
 Óch d'r Neëd dem alles  
 i sjtich jelosse hat,  
 lekt ziech neëver ing  
 zivve moal jesjtôrve kats.

En allewiel  
 sjiengt de zon,  
 weëd 't laoch ummer klinger  
 en vange vier werm aa  
 sjuupjer tse kere  
 en rues-je tse jisse.  
 En de mam vertselte an  
 noaberskinger  
 ja, ja,  
 zoeë jeet dat  
 allewiel.

***Pieke Lint, Mestreech***  
**Geis**

Vaan de Vriethof nao de merret  
En vaan dao weer tot Slevrouw  
Eve loupe nao de bekker  
Kops te vlaoj met appelekouw.

Oet de stasie nao Lambertus  
En weer trok goon aon de Maos  
Poos dao met e teske koffie  
En daan op nao Sintservaos

Door 't Stadspark nao Slevante  
Euver de Bosstraot tot op 't Fort  
'ne pot beer vaan eine liter  
Groeten doors kump niks te kort

Wat us dreif is neet te zègke.  
Boe- s te lops en wat-s te deis.  
't Is gewoon neet oet te lègke  
Preufs euveral Mestreechter Geis.

**Pieter Simons, Grubbevors**  
**Druimer in de bóch**

Lang höbs se gezóch  
 Wao geis se haer  
 Same of allein, bliefs se op de bein?  
 Druimer in de bóch,

Aan hieël wat moeëjs verknoch  
 Bliefs se zjweve  
 Hieël gedreve, laeve, laeve!  
 Druimer in de bóch,

Geis se op waeg  
 Luets se dich gaon  
 Sjprings se oet de band of euver de rand?  
 Druimer in de bóch, druimer in de bóch

*'t Wuurt 'ne lange toch*  
*Soms wat verward...*  
*Maar zeen 't neet te zwart en loester nao dien hart.*

*Dit wuurt 't begin*  
*Sjtel 't nimmer oet*  
*Nim ein besjloet en*  
*Gank veuroet*

Lang höbs se gezóch  
 Wao geis se haer  
 Same of allein, bliefs se op de bein?  
 Druimer in de bóch  
 Druimer in de bóch

***Pieter Simons, Grubbevors***  
**Oetgeprocedeerd**

Zie sjteit allein langs de waeg  
 Langs de lange waeg  
 Hae sjteit allein langs de waeg  
 Langs de lange waeg  
 Auto's raze al maar door  
 Veurbeej, veurbiej, veurbiej  
 't Sjteit gesjreve op de moer  
 Oetgeprocedeerd...

Hae lik allein in 't graas  
 In 't zaachte graas...  
 Zie lik allein in 't graas  
 In 't zaachte graas  
 De windj floestert, sjtriek door de haor  
 Veurbeej, veurbiej, veurbiej  
 't Kleurt in de raegenbaog  
 Oetgeprocedeerd...

Ze loupe same langs de zieë  
 Langs de wilde zieë  
 sjepe vare op en aaf  
 'n Vleegtuug raas veurbiej  
 Oet de golve klink 't op  
 Oetgeprocedeerd...

**Robert Janssen, Helje**  
**'n Kusje en 't is over**

Dao kumps se wir aangehule,  
 bis gevalle of kreegs neet diene zin.  
 Dieke traone over dien wengskes,  
 en 'n drama des se make kins.  
 't Duit pien, is neet leuk,  
 doe hees slaop of bis nag neet wakker,  
 erme stakker, erm erm meadje,  
 kom ins hei, kleine meid.  
 Det pap 'n indj macht aan det leid.

'n Kusje op dien wang,  
 o doe hees pien aan dien kneen?  
 Det kos ich efkes neet zeen.  
 Kom 'n kusje, is 't now vurbej?  
 Nag neet gans? Dan kries se 'n nei.  
 Wat zees se, sjat, det eine kusje waas al zat?

Straks kumt d'r 'ne tied,  
 dan geit 't neet mier.  
 Dan lukt 't neet,  
 det ich dien verdreet wegtover.  
 Now nog wel; 'n kusje en 't is over.

En nag later kin ich  
 dich neet mier besjerme,  
 teage wereldleid en hertepien,  
 dan is 't oetgewirkt  
 de kus van pap, dien ierste medicien.



***Robert Janssen, Helje***  
**Sjonder wurdt 't neet**

Ich heb dich in mien erm, dien uigskes zien toe.  
Doe bis meuj van 't wakker zien.  
Dich bis gans oetgeteld en ligs 'n bietje sjuun,  
zaats se zoe ouch in de boek missjien?  
En dan strumpt d'r zoeveul geluk door mien lief,  
en mei dink ich; as ich d'r now in blief,  
huul dan neet um mich, nae, heb gen verdreet,  
want sjonder as dit wurdt 't neet.

***Ruud Offermans, Zitterd***  
**Landjsjap**

alles zal angesj waere  
allein landjsjap zal blieve  
wie 't d'r altied al ewig is

ós 't idee guf dat v'r  
urges thoesheure, dat v'r  
noots meer weg houwe

***Ruud Offermans, Zitterd***  
**Nutterkruuts**

ze zeen langzaam aan 't heengaon  
'n tiedperk zal hiedoor sjterve:  
zeumere bie 't vertroewde Nutterkruuts  
mit in de wiedte de werm naojaorszón

glooiïnge wie klein bossages nao ónger gaon  
aeve weien dichzelf kinne zeen, daoróm  
de herinneringe van toen aan wat  
't Nutterkruuts dich nog gaeve kint nao

al die jaore van langzaam 't laeve verlaote

***Thieu Stauder en Irene Kusters, Beech  
kroedwèsj***

't greun pawmteske achter 't kruuske  
 waor de zaege äöver jeder huuske  
 't besjermde taeg bliksem en óngelök  
 dat gluífde weer heilig, jaore trök

väör Pawmzónjig wore de tekskes geploch  
 en ich moos nao kirk gaon, dat weit ich nog  
 want dao woor dan plechtig de kroedwèsj gewied  
 mer óngerwaeges vergoot ich d'n tied

de tek van de groate buim in de weie  
 wènkde nao mich en ich mein dat ze zeie:  
 kóm hiej, hiej baove, höbs dich mesjien zin?  
 kóm hiej, hiej baove, klöm drin, klöm drin

door ein gaat in de hèk kroop ich drop aan  
 en ein, twieë, drie zaot ich dao op miene troan  
 mit kaolzwarte henj en de brook vol sliék  
 waor ich de kääning van 't Zawpenseriek

zoa druumde ich weg tot 't ougenblik  
 dat de klokke loewde en ich stief van sjrik  
 niks anges mieë wos es op heives aan gaon  
 zónger de zaege want de mès waor gedaon

de kroedwèsj sjtrang vas en 't zweit oppe kop  
 bedach ich mich: wie los ich dit noe toch op?  
 ich doon of de naas blooijt dan is m'n tevreje  
 en is mien leid nog 't flotste geleje

dao reep mich opèns 't vruike van bie ós naeve:  
 zèk jóng, wils dich mich ein pawmtekske gaeve?  
 ich koos neet gaon en dich hōbs t'r drie  
 dan maaks te mich ech versjrikkelik blie

't vruike waor awd, woonde al jaore allein  
 ich koos toch neet zègke, ich gaef lever gein  
 mer wie ich 't goof, kaom drek al de spiet  
 en dát gevoel, woon ich gaar neet mieë kwiet

want zoa dèk es 't hómmelede es ich ging sjlaope  
 laog ich stief in béd mit de ouge wuud aoep  
 ich baejde ónze vaders en nog mieë weesgegroete  
 en houpde dan vurig op ein wónjer hie boete

es de wèndj weer ging ligke es 't nót haw gedaon  
 en ich 't hoes van 't vruike nog vredig zaog sjtaon  
 dan waor ich zoa blie en zag ich: Levenhieër  
 ich maak 't waal good de volgende kieër

en mit Pawmzónjig ein good jãörke later  
 sopde ich mien tekskes flink in 't water  
 en óm zoa ein nuuj wónjer to vãörkómme  
 haw ich die vãör 't vruike mit heives genómme

ich zaog aan häör ouge dat ze neet haw verwach  
 dat ich deze kieër ouch aan häör haw gedach  
 en wie ze mich toen door mien krolle vreef  
 zag ze: volgend jaor wéér jóng?....es God bleef...

***Ton Doesborgh, Tegele*****Twieëde plök**

Zeen ich ein broed en broedegom sjtaon  
 Same 't stadhoes op gaon  
 Dink ich in gedachte dök  
 Dao geit ein aspirantlid veur ós club  
 Daorum mótte ze now al weite  
 As eine 't muug wuurt geit e pleite.

Of dien sjoeënmoder mót dich neet  
 Daovan haes se altied verdreet  
 De verjaordaag wuurt vergaete  
 Wils èns aan ein angel taofel aete  
 Zits neet mier al te good in dien vel  
 Bös gaaroet neet mier zoeë in tel

As 't dich den neet bevelt  
 Kees se eiere veur dien geld  
 Maak dich toch gen dieke beine  
 Neet mier bäöke óm dae eine  
 Plök d'n daag, geneet 't laeve  
 Euveral kums se greune blaedjes taege

Daorum eine goje raod  
 Twieëde plök is neet zoeë kwaod  
 D'n hemel geit wir veur dich aope  
 Zelfs ein blömpke geis se koupe  
 De kinger laeve al van rente  
 Zits dow wir midde in de lente

Kammeraaj, vriendinne doot bescheid  
Vertel 't jidderein lank en breid  
Gaef ze allemaol goje raod  
Twieëde plök is neet zoeë kwaod  
Zelfs beej dien kinger gebeurt 't dök  
Ouch die waere sjtraks wir twieëde plök.

**Wiel Roeselers, Broenssem****'n Kruutske**

'n Kruutske langs de weëg  
Tusje graas en brieëmekroed  
Kiekt noa de passante  
En uëver Limburg oet

'n Kruutske langs de weëg  
Blief d'r 'ns bie sjtoa  
Ruum 'ns op in dien gedanke  
Om dan weer frisj wiejer te goa

'n Kruutske langs de weëg  
't Sjteet doa vuur rieke en erme  
Mansluuj, vrouwluuj en kinjer  
Om dich 'ns aan te werme

'n Kruutske langs de weëg  
Van iezer, sjtee, of hoot  
Went 't dich in 't hertje raakt  
Is 't egelik van good!



***Wiel Roeselers, Broenssem*****Neet mieë doa**

Went ich kiek in heur oge  
En zieën ze soms verweëze sjtoa  
Dan deet dat in 't hart pien  
't Miensjke is neet mieë doa

Zoeë kan 't os allemoale  
Gelierde en wirkman vergoa  
Dat vier waal nog hie zint  
Mer egelik neet mieë doa

***Pierre Schnackers, Bóches***  
**oktober**

herfskluëre  
d'r daag jelofo  
ee letste tes-je tieë

heë- jedreëve en jet  
knuppel, doof  
en egezinnig  
kiekt foesballe

zie- jet mollig en  
kót va oam  
evvel fiefig, bekiekt  
meëdjjes-ongerwesj

jans ónjemerkt treffe  
tsevreie blikke zich  
in de sjpiggeling  
van ing verjeelde  
trouwfoto

***Jean M. Claessens, Mestreech***  
**Luustere**

Höbt geer al ins zitte luustere,  
de ouge touw, in d'n duustere  
wie sjoen de stèlte kin zien?  
Ein stèlte die heilig is,  
veur vääöl lui ei gemis  
want 't leve raos mer door  
is kwiet eder spoor.

Mèr sleet eur ouge,  
doot ze touw,  
laot langs uuch gaon  
al de herrie, dat gesjouw  
en preuf de stèlte die heilig is  
in deze jachtende tied  
ei groet gemis.  
Heilig is de stèlte  
in al häör prach  
ei gegeve dat  
edere mins tegelach.

*Thei Stenzel, Heële*  
**Herfs-haiku**

sjieëmer krupt noader  
sjravele teëge d'r windj  
heem pruttelt de soep

velde umgeploogd  
ligke sjtil in verwachting  
doeëd is louter sjien

***Thei Stenzel, Heële  
leefste***

leefste  
lope durch de sjtad  
noa zoeëveul joar mit dich  
nog ummer hand in hand  
get moelentere  
get sjwiegentere

doa dink ich inèns  
- zoeëget mó't me neet dinke  
pien in d'r kop  
kramp um 't hart -  
doa dink ich inèns  
leefste  
es doe d'r neet mieë bis  
dan val ich  
dan val ich  
in 'n loak zoeë deep zoeë sjwart  
kom ich dan doa nog oeëts nog oet

leefste  
ich pak dien hand get vaster vas  
doe kieks mich aa en vroags: wat is  
ich lach dich aa en zèk:  
sjoeën weer hu wah  
woe gónt vier ós get eëte

***Mien Wijnhoven, Zaerum***  
**Jaorgetieje**

Die kestanjeknuup,  
blinkend en bijna barstend  
van niejschirrigheid!

Viêf glaze knickers  
in 'n schaalte en kiêk: viêf  
zónnen as toegift.

Stil stieët 't paerd, want  
zootjes striede raegen en  
wingd zien aoje vâcht.

Hieël efkes snieëjt 't,  
hieël efkes mar is os zeel en  
zaligheid wit.

***Mien Wijnhoven, Zaerum*****Mam**

Van ónger wies bouve toegestopt,  
Klags se det d'r wer gaar niks van klopt,  
Det 't toch wal wiêd - en nag zo fris -  
Nieë, nag lang ginne lêngten is!

'k Vaar dich dor de stille straote,  
Huur des se in dichzelf bliefs praote.  
Traone rolle; mien oeëgen blîngd  
Dor de zón en zafte vöörjaorswîngd.

Dien vraog is krek wer wie de vörrig:  
'Os vader; wits doow nog wie din heet?'  
Ik zek 't, mar dien grotste zörg  
blijft toch 't pluske vanne plaid.